



Publicaziuns officialas dils 01-10-2021

Curdem da gronda dimensiun

La vischnaunca organischescha ina rimnada da rufid bloccont sco suonda:

Venderdis, ils 29 d'october 2021 dallas 08.00 - 18.00 uras

Ei vegn rimnau il rufid per l'entira vischnaunca sin la piazza Igniu (spel baghetg economic)

Ils curdems ein da deponer els containers ni navettas tschentai sil plaz. Per tener-casa vegn priu encunter **max. 2 m³** rumians. Quantitads pli grondas ein da transportar directamein e sin cuost dil caschunader ella deponia regiunala a Rueun. Rumians jamnils vegnan buca pri encunter. Tals rumians ein da plazzar als plazz da rimnada usitai els vitgs e che vegnan rimnai entras la Regiun Surselva mintgamai la mesjamna.

Ei vegn acceptau

- maschinas pintgas e mopeds senza ieli e benzin, da tuttas sorts fier, maschinas electronicas senza ieli, mobiliar movibel, requisits per il temps liber e sport,
- per pneus senza gavegl vegn incassau ina taxa da frs. 5.--, cun gavegl frs. 10.--
- per pneus da maschinas agricolas pintgas vegn incassau ina taxa da frs. 20.-- e per pneus da tractur frs. 50.--.
- calzera da skis san vegnir dai giu en favur dalla ARGO Tavau per frs. 5.--

Buca acceptau vegnan

- tuttas maschinas agricolas, lenna da brisch, lenna veglia e da baghetg, sacs da pupi ni plastic, materials da pachetar, requisits dil temps liber gronds, blachas da ballas da silo, curdems da baghetg, curdem verd da curtin.

Nus appelein alla responsabladad da vischinas e vischins e supplichein da setener vid quellas directives en favur digl ambient. Medemamein fagein nus attents da buca deponer rumians sin deponias illegalas (selvadias). Talas deponias cunterfan alla legislaziun per la dismissa da rumians e vegnan annunziadas als organs responsabels e puni.

Per ulteriuras informaziuns stat il gerau responsabel bugen a Vossa disposiziun.

Sumvitg, 01-10-2021

Departament d'ambient

Preparaziun sin temps d'unviern

Tenor art. 69 dalla lescha da baghegiar ei la vischnaunca autorisada da schar dismetter la neiv dils implonts publics d'avertura sil schischom privat cunfinont cun prender il duiv risguard sin baghetgs, implonts e cultiras. Per liung dallas vias publicas e privatas ein seivs demontablas ni implonts da tal gener d'allontanar. Ultra da quei ston caglias e roma vegnir tagliadas anavos aschia che la rumida da neiv vegn buca impedita.

Quellas lavurs da preparaziun sil temps d'unviern ston vegnir exequidas entochen alla fin d'october 2021. En cass d'omissiun refusescha la vischnaunca suenter la sesiun d'unviern scadins donns occuri ord la rumida da neiv.

Sumvitg, 01-10-2021

Departament traffic

Rumida da neiv 2021/2022

La vischnaunca exequescha era uonn puspei sin incarica la rumida da neiv per privats. L'indemnisaziun per quella lavur corrispunda allas cundiziuns che l'industria privata pretenda. Plinavon sto quella dismessa da neiv star anavos en prioritad alla rumida dils implonts publics d'avertura. Sche pusseivel duei l'incarica vegnir surdada alla vischnaunca mo leu nua che quella procura era la dismessa dallas vias cunfinontas. Vischinas e vischins che vulan schar exequir la vischnaunca la rumida da neiv da lur vias e parcadis privats durant gl'unviern proxim ein supplicai d'annunziar quei a scret ni per telefon entochen ils **31 d'october 2021** al cau dil menaschi stradal (tel. 079 483 52 97).

Sumvitg, 01-10-2021

Departament traffic

Uffeci civil Surselva

Mortori

Caviezel Vitus, naschius ils 04-05-1942, morts ils 20-09-2021, staus sesents a Cumpadials.

Sumvitg, 01-10-2021

Controlla da habitonts

Uniun Lag Salischinas

Radunonza generala dall'Uniun Lag Salischinas

Ei legra la suprastonza dall'Uniun Lag Salischinas d'envidar alla radunonza generala 2021. La radunonza ha liug **venderdis, ils 8 d'october 2021** allas 20.00 ell'ustria «Greina» a Rabius. Per la radunonza generala val in obligatori da certificat da Covid per tut ils participonts. Nus supplichein per Vossa capientscha.

Tractandas:

1. Avertura e beinvegni
2. Elecziun da dumbravuschs
3. Approbaziun dil protocol dalla radunonza generala 2020 (Protocol ei publicaus sin la pagina d'internet www.lagsalischinas.ch)
4. Rapport digl onn ed informaziuns davart il stan dil project
5. Orientaziun davart organisaziun da project
6. Quen annual
7. Rapport dils revisurs
8. Discarga dalla suprastonza
9. Elecziuns a. president b. suprastonza c. revisurs
10. Contribuziuns da commembradi
11. Varia

Nus sperein sin stedia participaziun e salidein cordialmein. *La suprastonza dall'Uniun Lag Salischina*

Pro S. Benedetg, Clavadi e contuorn

Communicaziun (Radunonza generala)

Caras commembras, cars commembers. Era uonn havein nus da sefatschentar cun rescas e mesiras malemperneivlas pervia dil coronavirus. Ord quels motivs ha la suprastonza decidiu che la radunonza generala che havess giu liug ils 2 d'october 2021 ha buca liug. Nus supplichein per Vossa capientscha e salidein. *La suprastonza*

Mitteilung (Generalversammlung)

Liebe Mitglieder, auch dieses Jahr müssen wir uns mit Risiken und Ungemütlichkeiten bezüglich des Coronavirus befassen. Aus diesen Gründen haben wir entschieden, die GV vom Oktober 2021 abzusagen. Wir bitten Sie um Verständnis und grüssen Sie. *Der Vorstand*

Uniun gimnastica da dunnas Rabiis

Invitaziun alla radunonza generala gliendisdis, ils 4 d'october 2021, allas 20.00 en casa da scola Rabiis.

Has ti gust da far gimnastica cun ina coola truppa da dunnas? Nus fagein fitness per gl'unviern, badminton, fagein giugs sco per exempel unihockey, ballareit, ni tener nies tgierp fit cun step aerobic. Vegni semplamein gliendisdis alla radunonza, ni vegni inagada a fuffergniar. Annunzias tier Sandra Bearth (078 913 07 10) Nus selegrein da tei! *Il comite*